

Erindisbréf **fyrir samráðshóp um endurskoðun búvörusamninga.**

1. gr.

Samráðshópur um endurskoðun búvörusamninga er skipaður af sjávarútvegs- og landbúnaðarráðherra sbr. ákvæði til bráðabirgða í lögum nr. 102/2016 um breytingu á búvörolögum, búnaðarlögum, tollalögum og lögum um velferð dýra (búvörusamningar, búnaðarlagasamningur). Samráðshópur um endurskoðun búvörusamninga er skipaður átta fulltrúum og kemur hlutverk hans fram í ákvæðum erindisbréfs þessa.

2. gr.

Í stjórnarsáttmála ríkisstjórnar Sjálfstæðisflokksins, Framsóknar og Vinstri grænna kemur fram að Ísland eigi að vera leiðandi í framleiðslu á heilnæmum landbúnaðarafurðum. Leggja verði áherslu á nýsköpun, vöruþróun og verðmætasköpun auk þess sem stuðla verði að byggðafestu. Meginmarkmiðið sé að landbúnaður sé sjálfbær og að vernd búfjárstofna sé tryggð. Ríkisstjórnin leggur áherslu á að innleiddir verði sérstakir tímabundnir aðlögunarsamningar um nýja starfsemi til sveita og að slíkir samningar verði háðir skilyrðum um byggðafestu, verðmætasköpun og búsetu viðkomandi jarðar og geti stuðlað að nýsköpun, natúruvernd og nýjum áherslum í rannsóknum og menntun.

Forsenda þess að landbúnaður geti nýtt tækifæri framtíðarinnar telur ríkisstjórnin vera jafnvægi í framleiðslu, skilvirkt eftirlit og nýsköpun. Tryggja skuli rétt neytenda til upplýsinga um uppruna, framleiðsluhætti, lyfjanotkun og umhverfisáhrif og ráðast þurfi í aðgerðir til að draga úr umhverfisáhrifum matvælaframleiðslu auk þess að efla lífrænan landbúnað.

3. gr.

Mikilvægt er að stuðla að áframhaldandi framleiðniaukningu í landbúnaði með það að markmiði að kostnaðarverð sem flestra íslenskra landbúnaðarafurða nálgist kostnaðarverð sömu eða hliðstæðra afurða erlendis að teknu tilliti til gæða og landfræðilegrar legu.

4. gr.

Við endurskoðun búvörusamninganna skal horft til þeirra atriða sem kveður á um í ákvæðum samninganna, sbr. 5. - 8. gr. Jafnframt skulu þær áherslur sem fram koma í 2. og 3. gr. hafðar að leiðarljósi við endurskoðunina.

5. gr.

Við endurskoðun *samnings um almenn starfsskilyrði landbúnaðarins* skal horft til þess hvernig markmið samningsins hafi gengið eftir og það metið í samhengi við samninga um starfsskilyrði garðyrkju, nautgriparræktar og sauðfjárræktar. Vísast til 1. gr. samningsins þar sem markmið hans koma fram. Jafnframt er hópnum falið að skoða hvort ástæða sé til að breyta vægi stuðningsgreiðslna milli einstakra verkefna, í ljósi fenginnar reynslu og áherslna í stjórnarsáttmála og leggja þá fram tillögur þar að lútandi.

6. gr.

Við endurskoðun *samnings um starfsskilyrði sauðfjárræktar* skal horft til þess hvernig markmið samningsins hafi gengið eftir. Vísast til 1. gr. samningsins þar sem markmið hans koma fram. Jafnframt skal horft til eftirfarandi atriða, en ekki er um tæmandi talningu að ræða:

- a. Hvernig framleiðsla sauðfjárafurða og afkoma í greininni hefur þróast.
- b. Hvaða árangur hefur náðst við útflutning, þ.e. hvort útflutningstekjur hafi aukist.
- c. Hvort hlutur bænda í heildarverðmætasköpun greinarinnar hafi aukist.

- d. Hvort fé hafi fjölgað í landinu sem gefi tilefni til þess að fyrirkomulag býlisstuðnings verði endurskoðað. Við þá endurskoðun skal hafa í huga að styðja við byggð alls staðar á landinu.
- e. Hver hafi verið þróun framleiðni í greininni og hvort sú þróun sé viðunandi frá sjónarmiði samkeppni við aðra matvælaframleiðslu og afkomu bænda.
- f. Hvort ástæða sé til þess að breyta áherslum samningsins, sérstaklega með tilliti til sértækra aðgerða ríkisstjórnarinnar vegna kjaraskerðingar sauðfjárbænda. Hugað verði að leiðum til að fyrirbyggja að álíka aðstæður geti skapast í greininni.

7. gr.

Við endurskoðun *samnings um starfsskilyrði nautgriparæktar* skal horft til þess hvernig markmið samningsins hafi gengið eftir. Vísast til 1. gr. samningsins þar sem markmið hans koma fram. Jafnframt skal horft til eftirfarandi atriða, en ekki er um tæmandi talningu að ræða:

- a. Hvernig framleiðsla hefur þróast í mjólk og nautakjöti.
- b. Hvaða árangur hafi náðst við útflutning mjólkurafurða.
- c. Hver hafi verið þróun framleiðni í greininni og hvort sú þróun sé viðunandi frá sjónarmiði samkeppni við aðra matvælaframleiðslu og afkomu bænda.
- d. Taka skal afstöðu til þess hvort afnema skuli kvótakerfi í mjólkurframleiðslu frá og með 1. janúar 2021 og leggja þá fram tillögur þar að lútandi.

8. gr.

Við endurskoðun *samnings um starfsskilyrði framleiðenda garðyrkjuafurða* skal horft til þess hvernig markmið samningsins hafi gengið eftir. Vísast til 1. gr. samningsins þar sem markmið hans koma fram. Jafnframt skal horft til eftirfarandi atriða, en ekki er um tæmandi talningu að ræða:

- a. Hvernig framleiðsla garðyrkjuafurða hefur þróast.
- b. Hvernig markmiðum um allt að 95% niðurgreiðslu vegna flutnings raforku hefur gengið eftir.
- c. Hver hafi verið þróun framleiðni í greininni og hvort sú þróun sé viðunandi frá sjónarmiði samkeppni við aðra matvælaframleiðslu og afkomu bænda.
- d. Greina skal hagkvæmni þess að taka upp uppskerutengdar greiðslur vegna útiræktaðra garðyrkjuafurða og kartaflna gegn mögulegri niðurfellingu og/eða lækkun tollverndar og/eða aðrar breytingar á opinberum stuðningi.

9. gr.

Samráðshópurinn skal skila framvinduskýrslu til sjávarútvegs- og landbúnaðarráðherra eigi síðar en 1. júní 2018 og lokaskýrslu eigi síðar en 31. desember 2018. Skal lokaskýrsla innihalda ítarlega greinargerð og tæmandi talningu á tillögum samráðshópsins. Skal samráðshópurinn í störfum sínum hafa samráð við hlutaðeigandi aðila sem búa yfir sérstakri þekkingu á þessu sviði ef þurfa þykir.

Atvinnuvega- og nýsköpunarráðuneytinu, 7. febrúar 2018.

Kristján Þór Júlíusson
Sjávarútvegs- og landbúnaðarráðherra.